



Comunu de Quartu Sant'Aleni



Torrat a bivì su “Villaggio di Quarto – A.D. 1324” in su Parcu de Molentàrgius su 26 e su 27 de Iodàmini

Si torrat a su tempus passau po gosai de s'emotzioni de bivì cumentì si fadiat sèculus fait. A cou sa Batalla de Quarto fata torrai a bivì s'annu passau, Quartu Sant'Aleni proponit un'àtera atividadi po ingreghiai totus is amantis de sa stòria, in piessignu de sa stòria de sa Sardigna, e totus is curiosus chi bolint scoberri cumentì si biviat in s'isula in cussu tempus.

S'assòtziu Memoriae Milites de Casteddu, cun s'agiudu de su Comunu de Quartu, organizat po is diris de su 26 e 27 de Iodàmini chi benint su “Villaggio di Quarto – A.D. 1324”. Duas diris po torrai a fai bivì sa stòria in su Parco Naturale Regionale Saline-Molentargius, in sa parti Quartesa.

Ant a pigai parti unus cantus de assòtzius sardus. In paris cun is Memoriae Milites de Casteddu ant a essi protagonistas is Sagittarii Vagantes e sa Compagnia dell'Ariete Rampante de Is Crèsias, Sa Corporazione Arcieri Medievali e is Arcieri del Castello di Sanluri, su Popolo dai Mille Colori de Pauli.

Totus amantis de sa stòria, chi stùdiant is trastus de cussu tempus cumentu a armas, bistiris, ma puru is alàscias, is armaduras e fintzas is ballus, po torrai a poni in peis sa sociedadadi de cussu tempus. Spriculendi documentus stòricus circant is trastus po ddus torrai a fai e ddus imperai in sa manifestatzioni.

In su programa ddoi sunt vùstas cun una ghia a su populau de s'edadi de mesu, innoi studentis, quartesus e abitantis de sa Citadi metropolitana de Casteddu ant a castiai sa vida de sa Sardigna de su sèculu de catòdixi. Ant a essi ammostaus batallas cun is armaduras, artis, traballus, unu torneu de tiru cun s'arcu stòricu, una coja, sa fàbrica de su dinai e unus cantus ballus de s'edadi de mesu.

Custa manifestatzioni at a essi sa primu de is cuatru programadas in sa rassinna "Cagliari capitale 700 anni di storia" posta in peis de Memoriae Milites de Casteddu e de sa Pro Loco Città di Cagliari po afestai is setixentus annus de Casteddu Capitali de su Rennu de Sardigna.